



Erromeria Eguna egin dute Errenterian. Dantzariak kalejiran ibili dira herrian, Aiko dantza taldeak animatuta. Guztiek zuten gogoia berriro ere kalean dantzatzeko.

Iribarre dantza

Jakes Goikoetxea Errenteria

Automatikoa izan zen: Aiko taldekoen txistu hotsa hasi bezain pronto, jendearen hankak mugitzen hasi ziren. Gero, gerriak eta besoak. Dantzan hasi ez zirenek ere nekez euts zizaioketen hankarekin musikaren erritmoan lurra jotzeko tentazioari. Minutu gutxi batzuetan, edozein herri eta hiritako plaza zirudiena —kamatua, umeen parkearekin eta arkupearekin— dantza-leku bihurtu zen. Asteburu sargori bateko eguerdia, erromeria.

Jende nagusia elkartu zen batez ere atzo eguerdian Errenterian (Gipuzkoa) Koldo Mitxelena plazan. Gehienak emakumeak. Ordurako, txistulariek hasia zuten kalez kaleko ibilbidea, herritarrei gogorarazteko bi urteko etenaren ondoren bueltan zela Erromeria Eguna, Ereintza dantza taldeak antolatuta.

Iribarreak dira nagusi guztien aurpegian. Dantzara, festara joanak dira Errenterian Erromeria Eguna

Aikokoak, musika tresnak eta bozgorailuak probatzen. Dantzarietako batzuk, hamaiketako egiten. Beste batzuk, itzal bila. Talde argazkiak. Besarkadak. Joraldunak, joareak jartzen: bata lu-

rrean belaunikatu eta besteak indarra egiteko hanka bizkarrean jarriz eta soka estutuz.

Eta txistu, gitarra, danbolin... hotsa entzun bezain pronto, jendea dantzan. Batzuek botila ura eskuetan; bakarren batek garagarra. Beroketa izan zen, Errenterian kaleetan abiatu aurretik.

Erromeria ibiltaria

Aikokoek tresneria eta bozgorailu guztiak hartu zituzten, eta musikariak eta dantza-riak kalejiran abiatu ziren hurrengo geldialdia egitera, Niessen kulturgunera, Xabier Olaskoaga plazara. Erromeria ibiltaria.

Herritarren eguneroko eginbeharrak eta dantzarien saioak nahastu ziren. Batzuk erosketak poltsekin aurrera eta atzera; besteak Aiko taldeko Patxi Labordaren azalpenei eta mugimenduei jarraitzen.

Iribarreak ziren nagusi guztien aurpegian. Dantzara, festara joanak ziren Errenterian Erromeria Eguna. Iribarre bat Kontxi Mitxelena aurpegian. Betidanik gustatu zaio dantza egitea. Duela 11 urte,

dantza talde bat sortu zuten berak eta lagunek. Hemezortzi dira, horietatik lau edo bost gizonak. Dantza taldeari jarritako izenak adierazten du haren izena ere: Girona.



Kalejiran bildutako dantzariak. ARITZ LOIOLA / FOKU



Iribarreak izan ziren dantzarien aurpegian. ARITZ LOIOLA / FOKU



Selfie bat, Erromeria Egunaren itzulera gogoan izateko. ARITZ LOIOLA / FOKU



Guzkiak gogor jota ere, dantza egin zuten atzo Errenterian. ARITZ LOIOLA / FOKU

«Dantzan ondopasatzen dut», zioen Mitxelena. «Musika hasten baldin bada, hankak ere mugitzen hasten dira». Haren alabak ere duela urte batzuk aritu ziren dantzan, baina alabek dantza utzi zuten, ama hasi zen. «Pena bat dut», esan zuen, ondotik, Mitxelena lagun batek: «Hel-duak garelako hasi gara dantzan; lehenago hasi behar genuen».

Dantzarien zirkulu batek hartu zuen Xabier Olaskoaga plaza. Aurrera alde batera, gero bestera. Soinekoen eta aurreko mantalen festa. Kolore eta itxura ezberdinetakoak. Loredunak eta soilagoak. Oinetan, guztiak espartinak. Guztiek ez. Gizon bat Asics markako kirol oinetakoekin: *anima sana in corpore sano*.

«Dantza bizitza da»

Dantzarien artean, beste hiru irribarre: Arantxa Mujika donostiarra, eta Nere Mujika eta Maite Arraigo errenteriarak. «Dantza bizitza da niretzat», Nere Mujikak. Dantza asko egindakoa da. Gaztetan, igandero. Gaur egun, Beti Prest dantza taldean. Izena eta izana bat eginda, hor ere. COVID-19agatik ezarritako itxialdian ez zion utzi dantza egiteari. Musika jarri, eta etxean egin zuen dantza.

Arantxa Mujikarentzat «euskal gune oso polita» da Erromeria Eguna, eta «errotara bueltatzea», berriz, dantza egitea. Maite Arraigori, «sendatzeko» balio dio dantzak. Galderak erantzun bezain pronto bueltatu ziren hirurak dantzara, *La cucaracha*ren doinuekin, baina euskal dantzen mugimenduekin. Eta kalejirak aurrera jarraitu zuen. Erromeria Eguna ere bai.

Dantza festa ez zen atzo bukatu. Dantza asteburua da Errenterian: Errenteria Dantzan eguna egingo dute gaur. Ereintzak eta Gineako Grupo Cultural Netos de Bandim taldeak dantza egingo dute, 19:00etan, Zumardian.